

МЕСЯЦА ЯНВАРЯ В 5^{ми} ДЕНЬ.

**ПРЕДПРАЗДНСТВО ПРОСВЕЩЕНИЯ: И СВЯТЫХ МУЧЕНИК, ФЕОПЕМПТА
И ФЕОНЫ: И ПРЕПОДОБНЫЯ СИНКЛИТИКИИ.**

На Господи воззвах, стихиры мучеников, 3: И преподобныя, 3:

[И вся служба мучеников и преподобныя писана в Минеи.]

Слава, и ныне, предпразднства, глас 6:

Готовися Иордане реко, / се бо приходит Христос Бог / креститися от
Иоанна, / да змиев невидимыя главы сокрушит Божеством в водах твоих. /
Радуйся пустыне Иорданская, / горы играйте с веселием: / приходит бо вечный
Живот возвати Адама. / Глас вопиющаго возопий, / о Иоанне Предтече, /
уготовайте пути Господни, и стези Его правы соделайте.

На стиховне стихиры, глас 6:

Подобен: Триденвен:

Земля и наземная, играйте и радуйтесь, / поток сладости в реце крещается, /
излияние изсушая злобы, / и источает Божественное оставление.

Стих: Сего ради помянух Тя * от земли Иордански и Ермониимски.

Света сый податель Иисус, / не требуя креститися, / плотию восходит на
Иорданския струи, / просветити сущия / во тьме хотя. / Верою Сего усердно
срящем.

Стих: Видеша Тя воды, Боже, * видеша Тя воды, и убояшася.

Понес раба зрак, / предгрядеши креститися, Христе, / от раба, во Иорданских
струях, / избавляя от работы ветхаго греха, / и освящая / и просвещая нас.

Слава, и ныне, глас 6:

Да возрадуется пустыня Иорданова, / и да процветет яко крин: / глас бо
вопиющаго услышан бысть в ней, / уготовайте путь Господень: / горы бо
поставивый ставилом, / и удолия мерилом, / вся исполняяй яко Бог, / крещается от
раба. / Обнищавати начат богатныя дары даруяй. / Услыша Ева, / в печалех
родиши чада: / ныне же услыша Дева: / радуйся обрадованная, / Господь с Тобою,
/ имей велию милость.

Тропарь, глас 4:

Возвращашеся иногда Иордан / река милотию Елиссеевою, вознесшуся
Илии, / и разделяхуся воды сюду и сюду, / и бысть ему сух путь, иже мокрый, / во
образ воистинну крещения, / имже мы текущее жития переходим шествие: /
Христос явися во Иордане освятити воды. **[Единожды.]**

**На Повечерии канон, егоже краестрочие: И днесь же Субботу пою Великую.
Ирмос по дважды: тропари же на 6. Последи ирмос оба лика вкупе. Глас 6.**

Песнь 1.

Ирмос: Волною морскою покрывшаго древле, / гонителя мучителя Иорданския / струи спрятовает и крыет, / мое ныне очищая / человеческим очищением, / славно бо прославися.

Господи Боже мой, светоименное пение, и предпразднственную песнь Тебе поем, Божественным явлением таинственно обновльшему нас, и к светлости Божественней возводящему.

Горе превечна, и доле ново явльшася Тя, премирная и земная, Спасе, ужасахуся зряще, и еже паче слова Твое воспевашу снисшествие.

Да Твоя славы всяческая исполниши, Тебе Самого истощил еси даже и до рабья образа: ныне же длани раба подклоняеши главу рабски, мое наздание благоутробно очищая.

Песнь 3.

Ирмос: Тебе на водах основавшаго всю землю неодолимо, / тварь видевши плотию кримаго в водах, / ужасом многим содержащася: / несть свят паче Тебе Господи, взывающии.

Образы первее пророками показал еси, Твоего Богоявления, ныне же сокровенная действиями сказал еси, явль тайны человеком днесь, подая новое возрождение.

Простре Иордан воды яко плещи, с трепетом прияти Зиждителя телесно крещаемого, и вся освящающаго, несть свят паче Тебе Господи, взывающия.

Велие ко спасению напутие крещением подает Христос, чувствующим Его Божественное осияние, с веселием поющим: несть свят, паче Тебе Господи Человеколюбче.

Песнь 4.

Ирмос: Еже ко крещению Твое / пришествие провидя Аввакум, / ужася вопияше: / на море кони Твоя, воды многи навел еси, Спасе, смущающия.

Явльшуся Тебе телом, освятися земля, воды благословишася, небо просветится, род же человеков горькаго мучительства вражия избавися.

Глаголом Божественным ныне Предтеча из пустыни грядет ко Иордану, глаголя: покайтесь, приближися бо Небесное Царство, призывая вся к славе Божией.

Превращей первее море в сушу, и источники от несекомаго источив, прегрешений очищение ныне содевает во Иорданских струях огнем Духа.

Песнь 5.

Ирмос: Богоявления Твоего, Христе, / к нам милостивно бывшаго, / Исаия свет видев невечерний, / из нощи утренавав взываше: / просвещении

приидите, / омойтесь водою божественною, / и Духом яве и душу и тело очистите.

Новотвориши земнородных, нов Адам быв Содетель, огнем и Духом и водою странное совершая возрождение, и обновление чудное, кроме сокрушения и горним крещением Богодетельным новотворя.

Духом души новотвориши, водою же освящаеши тело сложеное, животна назидая человека: сугубому бо сродная, потребны лечбы мудрым промыслом приносиши, яко врач телес и душ.

От Чистыя прошед рождейся из Отца прежде веков, к существу из неплодных пришел еси, прося яко Человек крещения: но от воды таинственно Духом соделал еси, Спасе, многочадну Церковь, первее безчадную.

Песнь 6.

Ирмос: Яг бысть, / но не удержан страхом божественный Креститель: / аще бо и спрятовается приблизитися огню сено, / но слышав, остави ныне, / тече повеление исполняя яко раб, / Божественному же свыше свидетельствующему гласу, / услыша Сына Превечнаго.

Написался, но не поработился еси, кесаревым повелением повинуюся: аще бо и от работы утешение нам подая, вольно повинуешися, и даньствуеши дидрахму: но законом греха первее проданныя ны свободил еси ныне, и сыноположения удостоил еси.

Царствуеши, но не мирски, естеством сый Царь, аще бо и по плоти от племени Давидова родився, престол царствия, Спасе, сего приял еси, но свойственну имаши державу, царствуя со Отцем прежде веков присно, и во веки с Духом.

Царь убо, мира Начальник, и сущих в водах, древле пронаречеса: но удавляеся Твоим очищением, и низлагается яко езерский первее легеон, рук же Твоих, Спасе, создание поработенное от него, державною Твоею рукою освобождения сподобил еси.

Песнь 7.

Ирмос: Неизреченное чудо! / В печи избавивый преподобных отроки из пламене, / преклоняет верх, и просит крещения от раба, / очищая вопиущия: / Избавителю, Боже, благословен еси.

Счется струя первее милотию Иорданская, прообразующи крещение Твое: имже и страстей растерзается хитон: и нетления одежда самотворится вопиющим Богу: благословен еси.

Богатна струя, в себе бо приемше крещаемая Содетеля, показася источник животныя воды, на спасение нас песнопьющих: Избавителю, Боже, благословен еси.

Мертвость Божественную знаменительне образующе, погружением в воде трикратным в крещении Христу совостаем, тридневному востанию приобщающеса, и вопиюще Христу: благословен еси во веки.

Едина благодать Отца, Сына же, и Духа, совершающая даром желающим верно божественного крещения, сыноположения восприемшим власть, еже вопити: Боже, благословен еси.

Песнь 8.

Ирмос: Ужаснися бояйся небо, / и да подвижатся основания земли: / се бо водою облачится, / опаливый водою прежде праведнаго жертву преславно. / Егоже отроцы благословите, / священницы воспойте, / людие превозносите во вся веки.

Избавление грядет Христос крещением подати всем верным: сим бо Адама очищает, падшаго возвышает, низложшаго мучителя посрамляет, небеса отверзает, Духа Божественнаго низводит, и нетления причастие дарует.

Преста леств вражия, глас бо вопиющаго в пустыни, путь Господень, зовет, уготовайте, и вся стези Его правы творите, повелевает: дебрь бо смиряется, естество земных возвышается, гора и холм же врагов понижается.

О преславных даров! О Божественныя благодати, и несказанныя любве! Се бо водою очищает мя, огнем просвещает мя, и Духом Божественным совершает мя, Содетель и Владыка, ныне во Иордане в мое облекся естество Безгрешный.

Песнь 9.

Ирмос: Не рыдайте всуе отчаяния тенетами / удавляеми человецы повиннии злых: / но во умилении души приступим, / очищающему вся, яко единому Чистому, / и дающему прощение крещением.

Во страннем Твоем Рождестве, первее из Девы преестественно удивил еси, Слове Божий: ныне же величаем, велие таинство совершая преславно причастием честным, купель многочадну Божественным Духом.

Земля освятися Рождеством Твоим святым, Слове, поведающим небесем звездою славу Твою: ныне же водное естество благословися, Тебе плотию крещуся: и род земнородных к первому взыде паки благородию.

Да радуется земля вся, небо да веселится, мир да играет, реки да плещут рукою: источники, и езера, бездны, моря да срадуются: приходит бо Христос Адама очистити, и спасти Божественным крещением.

И паки ирмос. И поклон.

Ирмос: Не рыдайте всуе отчаяния тенетами / удавляеми человецы повиннии злых: / но во умилении души приступим, / очищающему вся, яко единому Чистому, / и дающему прощение крещением.

**НА УТРЕНИ,
на Бог Господь, тропарь предпразднства, трижды.**

Тропарь, глас 4:

Возвращашеся иногда Иордан / река милотию Елиссеевою, вознесшуся Илии, / и разделяхуся воды сюду и сюду, / и бысть ему сух путь, иже мокрый, / во образ воистинну крещения, / имже мы текущее жития переходим шествие: / Христос явися во Иордане освятити воды. **[трижды]**

По 1-м стихословии седален, глас 1:

Подобен: Лик ангельский:

Веселися реко Иордане, / в тебе бо всех Творец приходит волею крещение / прияти от раба, / яко благоутробен: / красуйся, ликуй Адаме, / и Ево прамати, / прииде избавление всех Бог преблагий.

Слава, и ныне, глас и подобен тойже:

Поток сладости Владыка сый, / предгрядет во струях речных креститися, / напоити мя хотя очищения водами. / Егоже зря Иоанн вопияше: / како руку мою на верх Твой простру, / Егоже трепещут всяческая?

По 2-м стихословии седален, глас 3:

Подобен: Красоте девства:

Адамову наготу одевая, благоутробне, / во одежду славы, хочещи обнажитися плотию во Иордане реце. / О чудесе преславнаго! / Какое Тя подымет вода, Владыко Господи, / водами покрывающаго превыспренняя, / якоже пишет: / поем, Иисусе благодетелю, / вси Твое явление.

Слава, и ныне, глас тойже:

Подобен: Божественныя веры:

Велие Солнце во Иордане просияти грядет, / еже из Девы из облака возсиявшее Христос Бог наш, / греховный отгоня мрак, / и мира просвещая концы. / Егоже осияния получитьи благочестно помолимся, / просяще прияти велию милость.

Каноны три: предпразднства со ирмосом на 6: ирмос по дважды: мучеников и преподобных два канона на 8: писаны в Минеи. Канон предпразднства, глас 1.

Песнь 1.

Ирмос: Горькия работы / избавлься Израиль, / непроходимое пройде яко сушу: / врага зря потопляема, / песнь яко благодетелю поет Богу, / чудедеющему мышцею высокою, яко прославися.

Христос грядет ко крещению, Христос ко Иордану приходит, Христос наша в воде погребает ныне грехи яко благ: с веселием воспоим Ему, яко прославися.

Да кропят веселящиеся облацы веселие вечное, Христос Иисус предгрядет водами Иорданскими, потоки греховныя потопити, просвещение всем даруя.

Се Свет является, се очищение показуется, се Спас предстоит просияти сущим во тьме Божественныя зари. Сего помышленьми честыми радостно подыдем.

Песнь 3.

Ирмос: Не мудростию / и богатством да хвалится смертный своим, / но верою Господнею православно зывая / Христу Богу, и поя присно: / на камени заповедей Твоих / утверди мя, Владыко.

Прежде веков седяй со Отцем и Духом, ныне в последняя из Девы воплощься якоже весть, Христос грядет ко крещению, безмертие Божественною банею всем подая.

Водою погребсти наша грехи хотя во Иорданских струях, за милосердие милости, Христос Бог предгрядет, и назидает истлевшия ны, крещением.

Обнажение студное покрывая Адама праотца, обнажаешься вольно: и струями Иорданскими Тебе Самого покрываеши, водами превыспренняя покрывая, Христе, едина многомилостиве.

Кондак предпраздства, глас 2:

Подобен: Вышних ища:

Всех, Христе, благоутробне / отъемляй прегрешений множество, / милости ради безмерныя, / Иорданскими водами креститися / грядеши яко Человек. / Одежду мя одевая, славы древняя обнаженна люте.

Седалны святых, в Минеи:

Слава, и ныне, предпраздства, глас 1.

Подобен: Гроб Твой, Спасе:

Великий дождь к речным струям предгрядет, / плотию креститися восхотев. / К Немуже божественный Предтеча ужасаяся глаголаше: / како крещу Тя скверны не имуща весьма? / Како простру мою десницу на главу, / еяже трепещут всяческая?

Песнь 4.

Ирмос: Слыша древле Аввакум, Христе, / чудный Твой слух, и страхом зываше: / от юга Бог приидет, и Святыи от горы приосененныя чащи, / спасти помазанныя: / слава силе Твоей, Господи.

Воду почерпите жизни, се ныне прииде мира река истинно, иссушити мутныя неверия воды, и просвещение источити поющим Ему: слава силе Твоей, Господи.

Веселися, пустыне, яже прежде жаждущая, естество все человеческое: ныне явися поток сладости, Иорданскими водами решая зной греха. Емуже поем верно: слава силе Твоей, Господи.

Вопиющего глас пророчески пустым возшуме помышлениям, уготовайте пути правыя Христу грядущему, глаголющ: яко да крещением очистит обветшавшия ны, разрешая первое осуждение.

Песнь 5.

Ирмос: Свет Твой незаходимый возсияй, Христе, / в сердца верно поющих Тя, / мир подаваяй нам, паче ума. / Тем от ночи неведения ко дню светом Твоим текуще, / славословим Тя, / Человеколюбче.

Мира, Христе, сый Царь, вражды средостение разорил еси, плоти подобием явився сущим на земли: темже пришествие Твое видев Иоанн, дивляшеся со страхом, рукоположити Тя повелеваемъ.

Змиев главы сокрушити Христос спеша ныне грядет водами, и трепещущему вопиет Крестителю: простри твою руку, и прикоснися верху Моему, и ужас отряси, совершая повеленное.

Сказаше пророк благодать иногда крещения Божественным Духом, поразив Иорданския струи милотию, яже разделишася, нам путетворящая возрождение Божественное, в них явльшагося Христа.

Песнь 6.

Ирмос: Весь от страстей безмерных содержуся, / и китом зол снизпадох, / но возведи из исления мя, Боже, / якоже прежде Иону, / и верою безстрастие ми даруй, / яко да во гласе хваления, и спасения духом пожру Ти.

Милосердие щедрот Христос показуя, в рабии зраце непреманный приходит к рабу прося крещения, от работы восхищая человечество: Егоже удивлься пришествию ужасается, и страхом одержимъ бывает.

Како Тя речныя струи примут, нестерпимаго огня, ныне идуща? Како обнажение небесний видят ангели? Како руку Иоанн прострет на Тя, Слове Божий Пребезначальне, того от земли создавшаго?

Море разделяется бежаще, показа новым людем Божественное прехождение, еже содела в реце плотию пришед, Иже из камене преславно источник воду. Сего яко Бога прославим, наше сокрушение наздавшаго.

Кондак предпраздства, глас 4:

Подобен: Явился еси днесь:

Во струях днесь Иорданских / быв Господь, Иоанну вопиет: / не убойся крестити Мя, / спасти бо приидох / Адама первозданнаго.

Икос: Не истязую тя Крестителя пределы преходити: не глаголю тебе, рцы Ми, яже глаголеши беззаконным, и учиши грешники: точию крести Мя молча, и чая яже от крещения: примши бо сего ради достоинство, еже не бысть ангелом: ибо всех пророков больша ты сотворю, от оных убо ни един яве Мя виде, но во образех и сенех, и гаданиих. Ты же пред тобою стояща видел еси: спасти бо приидох Адама первозданнаго.

Песнь 7.

Ирмос: Пройдоша яко чертог, / пещный пламень нестерпимый, / иже за благочестие иногда, отроцы святии показавшеся яве, / и согласно воспевающе, песнь пояху: / отцев Боже, благословен еси.

Христос спасение явися, просвещение даруя: да радуется небо, облацы же да кропят истинно правду, взывающим: отцев Боже, благословен еси.

Руно же еже провиде Гедеон, полна чаша воды искапавшия, яве Твое крещение сказоваше, Христе, еже подаеши крестився воспевающим: отцев Боже, благословен еси.

Славныя безчадствующия Елиссея исцеляя воды, благочадие честныя купели прообрази, хотящее быти таинственно, воспевающим: отцев Боже, благословен еси.

Песнь 8.

Ирмос: Чуда преестественнаго показа образ, / огнеросная пещь древле: / огонь бо не опали юныя дети, Христово являя / безсеменное от Девы Божественное Рождество. / Тем воспевающе воспоем: / да благословит тварь вся Господа, и превозносит во вся веки.

Хвалу велегласно Владыще возслем: прииде, явися, восходит на воды, и обнажается, небо облаки одевая, и крещается, очищая ны воспевающия: да благословит тварь вся Господа, и превозносит во вся веки.

Приидите мысленно, ко Иордану идем, видение велие в нем узрим: Иисус бо просвещение приходит, и раба преклоняется длани, с трепетом вопиюща: да благословит тварь вся Господа, и превозносит во вся веки.

Угль, Егоже провиде Исаия, в водах Иорданских разогревся, попали вещь всю грехов, и подаде сокрушенным наздание. Темже воспевающе воспоем: да благословит тварь вся Господа, и превозносит во вся веки.

Песнь 9.

Ирмос: Неизглаголанное Девы таинство: / небо бо Сия, и престол херувимский, / и светоносный чертог показася Христа Бога Вседержителя. / Сию благочестно / яко Богородицу / величаем.

Таинство странное зрю и преславное, Иисус грядет волею к реце Иордану, вопия Иоанну: твою десницу Ми, друже, взаимствуй, страшная совершающему людем Моим в снабдение.

Пустынная Иорданская да процветут: иже во тьме лежащии, велик явися вам Свет, видевше възграйте: Христос от Галилеи приходяй, плотию крестится от раба хочет.

Возвеселися ныне, Иордане, и ликуй, Иоанне възграй, вся вселенная радуйся: се явися Христос, и обнажается и крещается, во одежду облачая нетления человечество.

Светилен:

Подобен: Духом во святилищи:

Яко виде Тя обнажена Иордан, с трепетом к существу от неплодове рече: остави, о Иоанне, креститися Господа, огнем и Духом очищающего всю тварь: на сие бо прииде, освятити земныя, и водное естество.

Слава, и ныне:

Из Девы возсиявый в Вифлееме плотию, ко Иордану ныне тщится, скверну отмыти земнородных, к свету приводя во тьме сущия, крещением Божественным.

На хвалитех стихиры, на 4, глас 6:

Подобен: Ангельския предыдите силы:

Что не домышляешися, Крестителю, / смотрения, еже совершаю за всех спасение? / Древняя остави ныне, и помышляй полезная, / веруй Богу сошедшему, / и приступив, Мне послужи: / Бог бо приидох за благоутробие Адама очистити от падения.

Вземляй наша грехи на рамена, / пришел еси, Иисусе, / к струям Иорданским: / аз же ужасохся Твоего страшного пришествия, / како убо ми велиши крестити Тя? / Сам мя очистити пришел еси, / и како крещения / от мене просиши, / всех очищение?

Естества моего непостижное Слово, / в рабий же зрак одеявся приидох на Иордан, / никакоже мене отрещыся: / гряди, не бойся, / приближися ко Мне. / Десницу на верх Мой положив, возопий: / благословен явлейся, Боже наш, слава Тебе.

О паче ума безмерныя Твояе нищеты, / Слове Божий! / Мене ради падшаго, / познах Тя за милосердие во Адама облекшася, / и сущия от Адама обновляюща, / и повинующая Твоему велению, верно зову Тебе: / благословен явлейся, Боже наш, слава Тебе.

Слава, глас и подобен тойже:

С трепетом служа Иоанн Владыце, / радуется душою, и вопиет с веселием: / срадуйтеся мне вси роди праотца, / прииде бо чаяние наше, / прииде на Иордан Христос, / вся от греха Адамова очистити, / яко благоутробен.

И ныне, глас и подобен тойже:

Воспоим, людие, рожденному от Девы, / и в реце крещемуся Иордане, / и к Нему возопиим: / Царю всякия твари, / даруй нам неосужденно чистою совестью, / верно достигнути / Твое святое / из мертвых / тридневное востание.

На стиховне стихиры, глас 2:

Подобен: ДOME Евфрафов:

Се Царь, се чаяние / Израилево прииде: / людие радуйтеся, / Свет бо является.

Стих: Сего ради помянух Тя от земли Иордански и Ермониимски.

Узрися сущим на земли с плотию, / Божественный ныне Свет, / сущим во тьме явися, / и всем благодать возсия.

Стих: Видеша Тя воды, Боже, видеша Тя воды, и убояшася.

Светильниче Свету, заре Солнцу, / Предтече Слову, / друже Жениху / пророче послужи.

Слава, и ныне, глас 8.

[Анатолиево:] Иоанне Крестителю, / во утробе познавый Мя Агнца, / на реце Ми послужи, / со ангелы Ми службу принеси, / простер коснися рукою твоею верху Моему пречистому. / И егда узриши горы трепещущия, / и Иордан возвращающься, с сими возопий: / воплотивыйся от Девы в наше спасение, / Господи, слава Тебе.

По Благо есть: Трисвятое. По Отче наш, тропарь.

Таже ектении: И отпуст.

О ЧАСЕХ В НАВЕЧЕРИИ СВЯТЫХ БОГОЯВЛЕНИЙ, УКАЗ ПИСАН В ЧАСЕХ РОЖДЕСТВА ХРИСТОВА.

Последование Часов, певаемых в Навечерии Просвещения.

Речет иерей: Благословен Бог наш: Чтец: Аминь. Слава Тебе, Боже наш, слава Тебе. Царю Небесный: Трисвятое: по Отче наш: иерей возглас: Яко Твое есть Царство: Господи, помилуй, 12. Слава, и ныне: Приидите поклонимся: трижды.

Таже псалом Давидов 5:

Глаголы моя внуши, Господи, разумей звание мое. Вонми гласу моления моего, Царю мой и Боже мой: яко к Тебе помолюся, Господи. Заутра услыши глас мой: заутра предстану Ти, и узриши мя: яко Бог не хотяй беззакония Ты еси: не приселится к Тебе лукавнуяй, ниже пребудут беззаконницы пред очима Твоима: возненавидел еси вся делающия беззаконие. Погубиши вся глаголющия лжу: мужа кровей и льстива гнушается Господь. Аз же множеством милости Твоея вниду в дом Твой, поклонюся ко храму святому Твоему, в страсе Твоем. Господи, настави мя правдою Твоею, враг моих ради исправи пред Тобою путь мой. Яко несть во устех их истины, сердце их суетно, гроб отверст гортань их, языки своими льщаху. Суди им, Боже, да отпадут от мыслей своих: по множеству нечестия их изрини я, яко преогорчиша Тя, Господи. И да возвеселятся вси уповаующии на Тя, во век возрадуются, и вселишися в них: и похвалятся о Тебе любящии имя Твое. Яко Ты благословиши праведника, Господи, яко оружием благоволения венчал еси нас.

Псалом 22:

Господь пасет мя, и ничтоже мя лишит. На месте злачне, тамо всели мя, на воде покойне воспита мя. Душу мою обрати, настави мя на стези правды, имене ради Своего. Аще бо и пойду посреде сени смертных, не убоюся зла, яко Ты со мною еси: жезл Твой и палица Твоя, та мя утешиста. Уготовал еси предо мною трапезу сопротив стужающим мне: умастил еси елеом главу мою, и чаша Твоя упоявающи мя, яко державна. И милость Твоя поженет мя вся дни живота моего, и еже вселити ми ся в дом Господень в долготу дний.

Псалом 26:

Господь просвещение мое и Спаситель мой, кого убоюся? Господь защититель живота моего, от кого утрашуся? Внегда приблизатися на мя злобующим, еже снести плоти моя, оскорбляющийи мя и врази мои, тии изнемогоша и падоша. Аще ополчится на мя полк, не убоится сердце мое. Аще востанет на мя брань, на Него аз уповаю. Едино просих от Господа, то възыщу, еже жити ми в дому Господни вся дни живота моего, зрети ми красоту Господню и посещати храм святой Его. Яко скры мя в селении Своем в день зол моих, покры мя в тайне селения Своего, на камень вознесе мя. И ныне се, вознесе главу мою на враги моя, обыдох и пожрох в селении Его жертву хваления и воскликновения: пою и воспою Господеви. Услыши, Господи, глас мой, имже въззвах, помилуй мя и услыши мя. Тебе рече сердце мое: Господа възыщу, възиска Тебе лице мое, лица

Твоего, Господи, взыщу. Не отврати лица Твоего от мене и не уклонися гневом от раба Твоего: помощник мой буди, не отрини мене и не остави мене, Боже, Спасителю мой. Яко отец мой и мати моя остависта мя: Господь же восприят мя. Законоположи ми, Господи, в пути Твоем, и настави мя на стезю правую враг моих ради. Не предаждь мене в души стужающих ми: яко восташа на мя свидетеле неправеднии, и солга неправда себе. Верую видети благая Господня на земли живых. Потерпи Господа, мужайся, и да крепится сердце твое, и потерпи Господа.

Слава, и ныне, Аллилуиа, трижды. Господи помилуй, трижды.

Слава, тропарь, глас 4:

Возвращашеся иногда Иордан / река милотию Елиссеевою, вознесшуся Илии, / и разделяхуся воды сюду и сюду, / и бысть ему сух путь, иже мокрый, / во образ воистинну крещения, / имже мы текущее жития переходим шествие: / Христос явися во Иордане освятити воды.

И ныне, Богородичен:

Что Тя наречем, о Благодатная? Небо, яко возсияла еси Солнце правды. Рай, яко прозябла еси Цвет нетления. Деву, яко пребыла еси нетленна: Чистую Матерь, яко имела еси на святых Твоих объятиях Сына, всех Бога. Того моли спастися душам нашим.

Таже тропари сия поем по дважды, глас 8.

[Творение Софрония патриарха Иерусалимского.]

Днесь вод освящается естество, / и разделяется Иордан, / и своих вод возвращает струи, / Владыку зря крещаема.

И второй лик тойже тропарь.

Днесь вод освящается естество, / и разделяется Иордан, / и своих вод возвращает струи, / Владыку зря крещаема.

И паки первый лик припев: глас 8.

Стих: Сего ради помянух Тя от земли * Иордански и Ермониимски.

Яко Человек на реку пришел еси, / Христе Царю, / и рабское крещение прияти тщишися, Блаже, / от Предтечеву руку, / грех ради наших, Человеколюбче.

И второй лик второй припев: глас 8.

Стих: Видеша Тя воды, Боже, * видеша Тя воды, и убояшася.

И паки тойже тропарь.

Яко Человек на реку пришел еси, / Христе Царю, / и рабское крещение прияти тщишися, Блаже, / от Предтечеву руку, / грех ради наших, Человеколюбче.

Слава глас 8:

Ко гласу вопиющаго в пустыни, / уготовайте путь Господень, / пришел еси Господи, зрак рабий приим, / крещения прося, не ведый греха. / Видеша Тя воды, и убояшася. / Трепетен бысть Предтеча, и возопи глаголя: / како просветит светильник Света? / Какo руку положит раб на Владыку? / Освяти мене и воды, Спасе, земляй мира грех.

И ныне, паки тойже.

Ко гласу вопиющаго в пустыни, / уготовайте путь Господень, / пришел еси Господи, зрак рабий приим, / крещения прося, не ведый греха. / Видеша Тя воды, и убояшася. / Трепетен бысть Предтеча, и возопи глаголя: / како просветит светильник Света? / Какo руку положит раб на Владыку? / Освяти мене и воды, Спасе, земляй мира грех.

Таже прокимен, глас 4:

Прокимен: **И** возгреме с Небесе Господь, * и Вышний даде глас.

Стих: **Возлюблю** Тя, Господи, крепосте моя: Господь утверждение мое.

Пророчества Исаиина чтение: [Глава 35.]

Тако глаголет Господь: да возвеселится пустыня жаждущая, да возрадуется пустыня, и процветет яко крин, и да прозябнет, и вся возвеселятся. И возрадуются пустынная Иорданова, и слава Ливанова дана бысть ей, и честь Кармилова, и людие Мои узрят славу Господню, и высоту Божию. Укрепитеся руки ослабленные, и колена разслабленная утешитеся. И рцыте малодушным мыслию, укрепитеся и не бойтеся: се Бог наш суд воздает, Той приидет и спасет нас. Тогда отверзутся очеса слепых, и ушеса глухих услышат: Тогда скочит хромый яко елень, и ясен будет язык гугнивых: яко проразися в пустыни вода, и дебрь в земли жаждущей. И будет безводная в блата, и в жаждущей земли источник воды будет: тамо будет веселие птиц, водворение сиринов, и тростий, и блата. Тамо будет путь чист, и путь свят наречется: и не мимоидет тамо нечист, ниже будет тамо путь нечистый, разсеянии же пойдут по нему, и не заблудят. И не будет тамо льва, ниже зверей лютых взыдет нань, ниже обрящется тамо: но пойдут по нему избавлении и собраннии от Господа. И обратятся, и приидут в Сион с веселием и радостию, и веселие вечное над главою их. Хвала и радование, и веселие постигнет их: отбеже болезнь, печаль и воздыхание.

Деяний святых апостол чтение. [Зачало 33.]

Во дни оны, якоже скончаваше Иоанн течение, глаголаше: кого мя непщуете быти, несмы аз: но се грядет по мне, Емуже несмы достоин разрешити ремень сапогу Его. Мужие братие, сынове рода Авраамля, и иже в вас боящиися Бога, вам слово спасения сего послася: Живущии бо во Иерусалиме, и князи их сего не разумевше, и гласы пророческия по вся субботы чтомья, осудивше Его, исполниша. И ни единыя вины смертныя обретше, просиша у Пилата убити Его. Якоже скончаша вся яже о Нем писана, снемше с древа, положиша во гробе. Бог же воскреси Его от мертвых. Иже явися во дни многи совозшедшим с Ним от Галилеи во Иерусалим, иже ныне суть свидетелие Его к людем. И мы вам

благовествуем обетование бывшее ко отцем, яко сие Бог исполнил есть нам чадом их, воздвиг Иисуса.

Диакон: Премудрость, прости услышим святого Евангелиа.

Иерей: От Матфеа святого Евангелиа чтение. [Зачало 5.]

Во время оно, прииде Иоанн Креститель, проповеда в пустыни Иудейстей, И глаголя: покайтесь, приближи бо ся Царствие Небесное. Сей бо есть реченный Исаием пророком, глаголющим: глас вопиющаго в пустыни: уготовайте путь Господень, правы творите стези Его. Сам же Иоанн имяше ризу свою от влас вельблуждь, и пояс усмен о чреслах своих: снедь же его бе пружие и мед дивий. Тогда исхождаше к нему Иерусалима, и вся Иудея, и вся страна Иорданская: И крещахуся во Иордане от него, исповедающе грехи своя. Видев же [Иоанн] многи фарисеи и саддукеи, грядущия на крещение его, рече им: рождения ехиднова, кто сказа вам бежати от будущаго гнева? Сотворите убо плод достоин покаяния. И не начинайте глаголати в себе: отца имама Авраама. Глаголю бо вам, яко может Бог от камня сего воздвигнути чада Аврааму. Уже бо и секира при корени древа лежит: всяко убо древо, еже не творит плода добра, посекаемо бывает и во огонь вметаемо. Аз убо крещаю вы водою в покаяние: Грядый же по мне креплий мене есть, Емуже несмь достоин сапоги понести, Той вы крестит Духом Святым.

Таже: Стопы моя направи по словеси Твоему, и да не обладает мною всякое беззаконие. Избави мя от клеветы человеческия, и сохраню заповеди Твоя. Лице Твое просвети на раба Твоего, и научи мя оправданием Твоим. Да исполнятся уста моя хваления Твоего, Господи, яко да воспою славу Твою, весь день великолепие Твое.

Таже Трисвятное, и по Отче наш:

Священник: Яко Твое есть Царство:

Кондак предпраздства, глас 4:

Подобен: Явился еси днесь:

Во струях днесь Иорданских / быв Господь, Иоанну вопиет: / не убойся крестити Мя, / спасти бо приидох / Адама перевозданнаго.

Господи, помилуй, 40. Таже молитва:

Иже на всякое время, и на всякий час, на Небеси и на земли, поклоняемый и славимый, Христе Боже, долготерпеливе, многомилостиве, многоблагоутробне, Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи приими и наша в час сей молитвы, и исправи живот наш к заповедем Твоим: души наша освяти, телеса очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаемы, и наставляемы, достигнем в соединение веры, и в разум неприступныя Твоя славы, яко благословен еси во веки веков, аминь.

Таже, Господи, помилуй, трижды.

Слава, и ныне: Честнейшую херувим:

Именем Господним благослови, отче:

Священник: Боже ущебри ны и благослови ны, просвети лице Твое на ны, и помилуй ны.

Таже молитва:

Христе Свете истинный, просвещай и освящай всякаго человека грядущаго в мир, да знаменается на нас свет лица Твоего, да в нем узрим свет непреступный и исправи стопы наша к деланию заповедей Твоих, молитвами Пречистыя Твоея Матере, и всех Твоих святых, аминь.

ЧАС ТРЕТИЙ.

Приидите поклонимся: трижды.

Псалом Давидов, 28:

Принесите Господеву сынове Божию, принесите Господеву сыны овни, принесите Господеву славу и честь. Принесите Господеву славу имени Его, поклонитесь Господеву во дворе святем Его. Глас Господень на водах: Бог славы возгреме, Господь на водах многих. Глас Господень в крепости: глас Господень в великолепии. Глас Господа сокрушающаго кедрь, и стрыет Господь кедрь Ливанския. И истнит я яко тельца Ливанска, и возлюбленный яко сын единокорож. Глас Господа, пресецающаго пламень огня: Глас Господа, стрясающаго пустыню, и стрясет Господь пустыню Каддийскую. Глас Господень свершающий елени, и открит дубравы: и в храме Его всякий глаголет славу. Господь потоп населяет, и сядет Господь Царь во век. Господь крепость людем Своим даст: Господь благословит люди Своя миром.

Псалом Давидов, 41.

Имже образом желает елень на источники водныя: сице желает душа моя к Тебе, Боже. Возжада душа моя к Богу крепкому, живому: когда прииду и явлюся лицу Божию? Быша слезы моя мне хлеб день и ночь, внегда глаголатися мне на всяк день: где есть Бог твой? Сия помянух, и излиях на мя душу мою, яко пройду в место селения дивна, даже до дому Божия, во гласе радования и исповедания, шума празднующаго. Вскую прискорбна еси, душе моя? и вскую смущаеши мя? Уповай на Бога, яко исповемся Ему, спасение лица моего и Бог мой. Ко мне самому душа моя смятесе, сего ради помянух Тя от земли Иордански и Ермонимски, от горы малыя. Бездна бездну призывает во гласе хлябий Твоих: вся высоты Твоя и волны Твоя на мне преидоша. В день заповесть Господь милость Свою, и нощию песнь Его от мене, молитва Богу живота моего. Реку Богу: заступник мой еси, почто мя забыл еси? и вскую сетуя хожду, внегда оскорбляет враг? Внегда сокрушатися костем моим: поношаху ми врази мои, внегда глаголати им мне на всяк день: где есть Бог твой? Вскую прискорбна еси, душе моя? и вскую смущаеши мя? Уповай на Бога, яко исповемся Ему, спасение лица моего, и Бог мой.

Псалом 50.

Помилуй мя, Боже, по велицей милости Твоей, и по множеству щедрот Твоих очисти беззаконие мое. Наипаче омый мя от беззакония моего, и от греха моего очисти мя. Яко беззаконие мое аз знаю, и грех мой предо мною есть выну. Тебе единому согреших, и лукавое пред Тобою сотворих: яко да оправдишися во словесех Твоих, и победиши внегда судити Ти. Се бо в беззакониих зачат есмь, и во гресех роди мя мати моя. Се бо истину возлюбил еси, безвестная и тайная премудрости Твоя явил ми еси. Окропиши мя иссопом, и очишуся: омыеши мя, и паче снега убелюся. Слуху моему даси радость и веселие, возрадуются кости смиренныя. Отврати лице Твое от грех моих, и вся беззакония моя очисти. Сердце чисто созижди во мне, Боже, и Дух прав обнови во утробе моей. Не отвержи мене от лица Твоего и Духа Твоего Святаго не отыми от мене. Воздаждь ми радость

спасения Твоего, и Духом Владычним утверди мя. Научу беззаконныя путем Твоим, и нечестивии к Тебе обратятся. Избави мя от кровей, Боже, Боже спасения моего, возрадуется язык мой правде Твоей. Господи, устне мои отверзеши, и уста моя возвестят хвалу Твою. Яко аще бы восхотел еси жертвы, дал бых убо, всесожжения не благоволиши. Жертва Богу дух сокрушен: сердце сокрушенно и смиренно Бог не унижит. Ублажи, Господи, благоволением Твоим Сиона, и да созиждутся стены Иерусалимския. Тогда благоволиши жертву правды, возношение и всесожегаемая, тогда возложат на олтарь Твой тельцы.

Слава, и ныне: Аллилуиа, трижды. Господи, помилуй, трижды.

Слава, тропарь, глас 4:

Возвращашеся иногда Иордан / река милотию Елиссеевою, вознесшуся Илии, / и разделяхуся воды сюду и сюду, / и бысть ему сух путь, иже мокрый, / во образ воистинну крещения, / имже мы текущее жития переходим шествие: / Христос явися во Иордане освятити воды.

И ныне, Богородичен:

Богородице, Ты еси лоза истинная, возрастившая нам Плод живота, Тебе молимся: молися, Владычице, со святыми апостолы, помилувати души наша.

Таже поем тропари, глас 8:

Предтечи и Крестителя и пророка, / и паче всех почтена пророк, / трепеташе ныне рука десная, / егда виде Тебе Агнца Божия, / очищающаго миру согрешения, / и подвигом одержимь вопияше: / не смею прикоснуться, Слове, верху Твоему. / Сам мя освяти, и просвети, Щедре, / Ты бо еси Живот и Свет, и мир мирови. **[Дважды.]**

Стих: Сего ради помянух Тя * от земли Иордански и Ермониимски.

Таже тропарь, глас 4:

Троица Бог наш, / Себе нам днесь нераздельно яви: / ибо Отец явленным свидетельством сродства возгласи: / Дух же голубиным образом сниде с Небес: / Сын, пречистый верх Свой Предтечи приклони, / и крещься, человечество от работы избави, / яко Человеколюбец.

Стих: Видеша Тя воды, Боже, * видеша Тя воды, и убояшася.

И паки тойже тропарь.

Троица Бог наш, / Себе нам днесь нераздельно яви: / ибо Отец явленным свидетельством сродства возгласи: / Дух же голубиным образом сниде с Небес: / Сын, пречистый верх Свой Предтечи приклони, / и крещься, человечество от работы избави, / яко Человеколюбец.

Слава, глас 5:

Грядый с плотию ко Иордану, Господи, / креститися хотя во образе человека, Животодавче, / да прельстившихся нас, яко благоутробен, / всякия козни и сети змиевы избавив просветиши, / от Отца свидетельствуемь: / Божественный же Дух / голубиным видом Тебе предста: / но всели в души наша Того, Человеколюбче.

И ныне, тойже.

Грядый с плотию ко Иордану, Господи, / креститися хотя во образе человека, Животодавче, / да прельстившихся нас, яко благоутробен, / всякия козни и сети змиевы избавив просветиши, / от Отца свидетельствуемъ: / Божественный же Дух / голубиным видом Тебе предста: / но всели в души наша Того, Человеколюбче.

Таже, прокимен, глас 6:

Прокимен: Видеша Тя воды, Боже, * видеша Тя воды, и убояшася.

Стих: Гласом моим ко Господу возвах, гласом моим к Богу, и внят ми.

Пророчества Исаиина чтение: [Глава 1.]

Такo глаголет Господь: измыйтеся, и чисти будете, отымите лукавствия от душ ваших пред очима Моима: престаните от лукавствий ваших. Научитесь доброе творити, изыщите суда, избавите обидима, судите сиру, и оправдате вдовицу. И приидите, и истяжимся, глаголет Господь: и аще будут греси ваши яко багряное, яко снег убелю: аще же будут яко червленое, яко волну убелю. И аще хотите, и послушаете Мене, благая земли снесите. Аще ли же не хотите, ниже послушаете Мене, меч вы пояст: уста бо Господня глаголаша сия.

Деяний святых апостол чтение: [зачало 42.]

Во дни оны, бысть внегда быти Аполлосу в Коринфе, Павлу же прошедшу вышняя страны, приити во Ефес: и обрет некия ученики, Рече к ним: аще убо Дух Свят прияти есте веровавше? Они же реша к нему: но ниже аще Дух Святыи есть, слышахом. Рече же к ним: во что убо креститесь? Они же рекоша: во Иоанново крещение. Рече же Павел: Иоанн убо крести крещением покаяния, людем глаголя: да во Грядущаго по нем веруют, сиречь, во Христа Иисуса. Слышавше же крестися во имя Господа Иисуса. И возложшу Павлу на ня руке, прииде Дух Святыи на ня: глаголаху же языки, и пророчествоваху. Бяше же всех мужей яко дванадесять. Вшед же в сонмище, дерзаше, не обинуяся три месяцы беседа, и уверяя, яже о Царствии Божиим.

Диакон: Премудрость, прости услышим святаго Евангелиа.

Иерей: От Марка святаго Евангелиа чтение. [Зачало 5.]

Зачало Евангелиа Иисуса Христа Сына Божия. Якоже есть писано во пророцех: се аз посылаю ангела Моего пред лицем Твоим, иже уготовит путь Твой пред Тобою. Глас вопиющаго в пустыни, уготовайте путь Господень, правы творите стези Его. Бысть Иоанн крестяи в пустыни, и проповедае крещение покаяния, во отпущение грехов. И исхождаше к нему вся Иудейская страна, и иерусалимляне, и крещася вси во Иордане реце от него, исповедающе грехи своя. Бе же Иоанн оболчен власы велблужди, и пояс усмен о чреслах его: и ядыи акриды, и мед дивий. И проповедаше глаголя: грядет крепкий мене во след мене, Емуже несмы достоин преклонься разрешити ремень сапог Его. аз убо крестих вы в воде: Той же крестит вы Духом Святым.

Посем: Господь Бог благословен: благословен Господь день дне, поспешит нам Бог спасений наших: Бог наш, Бог спасти.

Посем Трисвятое, по Отче наш:

Иерей возглас: Яко Твое есть Царство:

Кондак предпразднства, глас 4:

Подобен: Явился еси днесь:

Во струях днесь Иорданских / быв Господь, Иоанну вопиет: / не убойся крестити Мя, / спасти бо приидох / Адама первозданнаго.

Господи, помилуй, 40. Таже молитва:

Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагоутробне, **Иже** праведныя любяй, и грешныя милуяй, **Иже** вся зовый ко спасению, обещания ради будущих благ. Сам Господи приими и наша в час сей молитвы, и исправи живот наш к заповедем Твоим: души наша освяти, тела очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаемы, и наставляемы, достигнем в соединение веры, и в разум непреступныя Твоя славы, яко благословен еси во веки веков, аминь.

Таже, Господи, помилуй, трижды.

Слава, и ныне: Честнейшую херувим:

Именем Господним благослови, отче:

Священник: Молитвами святых отец наших:

Таже молитва:

Владыко, Боже, Отче Вседержителю, Господи Сыне единородный Иисусе Христе, и Святой Душе, едино Божество, едина сила, помилуй мя грешнаго: и имиже веси судьбами спаси мя недостойнаго раба Твоего: яко благословен еси во веки веков, аминь.

На третьем и шестом Часе кадит диакон Евангелие и иконы и настоятеля и лики токмо.

ЧАС ШЕСТЫЙ.

Приидите поклонимся: трижды.

Псалом 73.

Вскую, Боже, отринул еси до конца? разгневался ярость Твоя на овцы пажити Твоея? Помяни сонм Твой, егоже стяжал еси исперва, избавил еси жезлом достояния Твоего: гора Сион сия, в нейже вселился еси. Воздвигни руке Твои на гордыни их в конец: елика лукавнова враг во святем Твоем. И восхвалишася ненавидящии Тя посреде праздника Твоего: положиша знамения своя, знамения, и не познаша. Яко во исходе превыше: яко в дубраве древяне, секирами разсекоша. Двери его вкупе, сечивом и оскордом разрушиша и. Возжгоша огнем святило Твое: на земли оскверниша жилище имене Твоего. Реша в сердцах своим южики их вкупе: приидите и отставим вся праздники Божия от земли. Знамения их не видехом, несть ктому пророка, и нас не познает ктому. Доколе, Боже, поносит враг? раздражит противный имя Твое до конца? Вскую отвращаеши руку Твою, и десницу Твою от среды недра Твоего в конец? Бог же Царь наш прежде века, содела спасение посреде земли. Ты утвердил еси силою Твоею море: Ты стерл еси главы змиев в воде. Ты сокрушил еси главу змиеву: дал еси того брашно людем Ефиопским. Ты расторгл еси источники и потоки, Ты изсушил еси реки Ифамския. Твой есть день, и Твоя есть ночь: Ты совершил еси зарю и солнце. Ты сотворил еси вся пределы земли, жатву и весну Ты создал еси я. Помяни сия: враг поноси Господеви, и людие безумнии раздражиша имя Твое. Не предаждь зверем душу исповедающуюся Тебе: душ убогих Твоих не забуди до конца. Призри на завет Твой, яко исполнишася помраченнии земли домов беззаконий. Да не возвратится смиренный посрамлен, нищ и убог восхвалита имя Твое. Востани, Боже, суди прю Твою: помяни поношение Твое, еже от безумнаго весь день. Не забуди гласа молитвенник Твоих: гордыня ненавидящих Тя взыде выну.

Псалом 77.

Гласом моим ко Господу возвах, гласом моим к Богу, и внят ми. В день скорби моя Бога взысках руками моима, нощию пред Ним, и не прельщен бых: отвержеся утешитися душа моя. Помянух Бога, и возвеселихся: поглумляхся и малодушествоваше дух мой. Предваристе стражбы очи мои, смятохся и не глаголах. Помыслих дни первыя, и лета вечная помянух, и поучахся. Нощию сердцем моим глумляхся, и тужаше дух мой. Еда во веки отринет Господь, и не приложит благоволити паки? Или до конца милость Свою отсечет? Сконча глагол от рода в род. Еда забудет ущедрити Бог, или удержит во гневе Своем щедроты Своя? И рех: ныне начах, сия измена десницы Вышняго: Помянух дела Господня: яко помяну от начала чудеса Твоя, И поучуся во всех делех Твоих, и в начинаниих Твоих поглумлюся. Боже, во святем путь Твой: кто бог велий, яко Бог наш? Ты еси Бог творяй чудеса: сказал еси в людех силу Твою, Избавил еси мышцею Твоею люди Твоя, сыны Иаковли, и Иосифовы. Видеша Тя воды, Боже, видеша Тя воды, и убояшася: смятошася бездны. Множество шума вод, глас даша облацы: ибо стрелы Твоя преходят. Глас грома Твоего в колеси, осветиша молния Твоя вселенную, подвижеся и трепетна бысть земля. В мори путие Твои, и стези

Твои в водах многих, и следы Твоя не познаются: Наставил еси яко овцы люди Твоя, рукою Моисевою и Ааронею.

Псалом 90.

Живый в помощи Вышняго, в крове Бога Небеснаго водворится. Речет Господеви: заступник мой еси, и прибежище мое, Бог мой, и уповаю на Него. Яко Той избавит тя от сети ловчи и от словесе мятежна. Плещма Своима осенит тя, и под криле Его надеешься. Оружием обыдет тя истина Его. Не убоишия от страха ночнаго, от стрелы летящая во дни: от вещи во тьме преходящая, от сряща и беса полуденнаго. Падет от страны твоя тысяща, и тьма одесную тебе, к тебе же не приблизится. Обаче очима твоима смотриши, и воздаяние грешников узриши. Яко Ты, Господи, упование мое, Вышняго положил еси прибежище твое. Не придет к тебе зло, и рана не приблизится телеси твоему. Яко ангелом Своим заповесть о тебе, сохранити тя во всех путех твоих. На руках возмут тя, да не когда преткнеши о камень ногу твою. На аспида и василиска наступиши, и попереши льва и змия. Яко на Мя упова, и избавлю и: покрыю и, яко позна имя Мое. Воззовет ко Мне, и услышу его: с ним есмь в скорби, изму его и прославлю его. Долготою дней исполню его, и явлю ему спасение Мое.

Слава, и ныне, Аллилуиа, трижды.

Господи помилуй, трижды.

Слава, тропарь, глас 4:

Возвращашеся иногда Иордан / река милотию Елиссеевою, вознесшуся Илии, / и разделяхуся воды сюду и сюду, / и бысть ему сух путь, иже мокрый, / во образ воистинну крещения, / имже мы текущее жития преходим шествие: / Христос явися во Иордане освятити воды.

И ныне, Богородичен:

Яко не имамы дерзновения, за премногия грехи наша: Ты Иже от Тебе рождшагося, моли, Богородице Дево. Много бо может моление Матернее, ко благосердию Владыки. Не презри грешных мольбы Всечистая, яко милостив есть, и спасти могий, Иже и страдати о нас изволивый.

Таже, стихира, глас 8:

Тако глаголет Господь ко Иоанну: / пророче, гряди крестити Мене, / тебе создавшего, и просвещающего благодатию, / и очищающего всех: / прикоснися Божественному Моему верху, / и не усумнися. / Прочее остави ныне, / ибо исполнити приидох правду всякую. / Ты же не усумнися отнюд, ибо таящагося в водах борителя, / князя тьмы тщуся погубити, / избавляя мир от его сетей ныне, / подая яко Человеколюбец живот вечный. **[Дважды.]**

Таже, глас 6:

Стих: Сего ради помянух Тя от земли Иордански и Ермониимски.

Днесь псаломское пророчество конец прияти спешит: / море бо, рече, виде, и побеже, / Иордан возвратися вспять, от лица Господня, / от лица Бога Иаковля, /

пришедша от раба прияти крещение: / яко да и мы идольския измывшесе нечистоты, / просветимся душами Его ради.

Стих: Видеша Тя воды, Боже, видеша Тя воды, и убояшася.

Паки тойже.

Днесь псаломское пророчество конец прияти спешит: / море бо, рече, виде, и побеже, / Иордан возвратися вспять, от лица Господня, / от лица Бога Иаковля, / пришедша от раба прияти крещение: / яко да и мы идольския измывшесе нечистоты, / просветимся душами Его ради.

Слава, глас 5:

Что возвращаеши твоя воды, о Иордане? / Что воспящаеши струи, и не преходиши еже по естеству хождение? / Не мощно ми терпети, рече, огня поядающаго мя. / Удивляюся и ужасаюся крайнему схождению: / яко не обыкох Чистаго измывати, / ни навыкох безгрешнаго отирати: / но оскверненныя сосуды очищати, / терния попаляти ми согрешений учит, / Иже во мне крещаемый Христос. / Иоанн свидетельствует ми глас слова, вопия: / се Агнец Божий вземляй грехи мира. / Тому вернии возопиим: явлейся, Боже, в наше спасение, слава Тебе.

И ныне: тойже.

Что возвращаеши твоя воды, о Иордане? / Что воспящаеши струи, и не преходиши еже по естеству хождение? / Не мощно ми терпети, рече, огня поядающаго мя. / Удивляюся и ужасаюся крайнему схождению: / яко не обыкох Чистаго измывати, / ни навыкох безгрешнаго отирати: / но оскверненныя сосуды очищати, / терния попаляти ми согрешений учит, / Иже во мне крещаемый Христос. / Иоанн свидетельствует ми глас слова, вопия: / се Агнец Божий вземляй грехи мира. / Тому вернии возопиим: явлейся, Боже, в наше спасение, слава Тебе.

Таже, прокимен, глас 4:

Прокимен В мори путие Твои, * и стези Твоя в водах многих.

Стих: Глас грома Твоего в колеси.

Таже, паремия.

Пророчества Исаиина чтение: [Глава 12.]

Так о глаголет Господь: почерпите воду с веселием от источник спасения. И речеши в день он: исповедайтеся Господеви, и призовите имя Его, возвестите во языцех славу Его: помяните, яко вознесеса имя Его. Пойте имя Господне, яко высокая сотвори: возвестите сия по всей земли. Радуйтеся и веселитесь живущии в Сионе, яко вознесеса Святыи Израилев посреде его.

К Римляном послания святаго апостола Павла чтение. [зачало 91.]

Братие, елицы во Христа Иисуса крестихомся, в смерть Его крестихомся. Спогребохомся убо Ему крещением в смерть: да якоже воста Христос от мертвых славою Отчею, тако и мы во обновлении жизни ходити начнем. Аще бо сообразни быхом подобию смерти Его, то и воскресению будем. Сие ведяще, яко ветхий наш человек с Ним распяты, да упразднится тело греховное, яко ктому не

работати нам греху. Умерый бо, оправдися от греха. Аще ли умрохом со Христом, веруем, яко и живи будем с Ним: Ведяще, яко Христос воста от мертвых, ктому уже не умирает, смерть Ему ктому не обладает. Еже бо умре, греху умре единою: а еже живет, Богови живет. Такожде и вы помышляйте себе, мертвым убо быти греху, живым же Богови, о Христе Иисусе Господе нашем.

Диакон: Премудрость, прости услышим святаго Евангелиа.

Иерей: От Марка святаго Евангелиа чтение. [Зачало 2.]

Во время оно, прииде Иисус от Назарета Галилейскаго, и крестися от Иоанна во Иордане. И абие восходя от воды, виде разводящася небеса, и Дух яко голубь сходящ Нань. И глас бысть с небесе: Ты еси Сын Мой возлюбленный, о немже благоволих. И абие Дух изведе Его в пустыню. И бе ту в пустыни дней чотыредесять, искушаемь сатаною: и бе со зверьми, и ангели служаху Ему. По предании же Иоаннове, прииде Иисус в Галилею проповедавая Евангелие Царствия Божия. И глаголя: яко исполнися время, и приближися Царствие Божие: покайтеся и веруйте во Евангелие.

Таже: Скоро да предварят ны щедроты Твоя, Господи, яко обнищавом зело: помози нам, Боже Спасе наш, славы ради имене Твоего, Господи, избави нас, и очисти грехи наша, имене ради Твоего.

Таже Трисвятое, и по Отче наш: священник: Яко Твое есть Царство:

Кондак предпраздства, глас 4:

Подобен: Явился еси днесь:

Во струях днесь Иорданских / быв Господь, Иоанну вопиет: / не убойся крестити Мя, / спасти бо приидох / Адама перевозданнаго.

Господи, помилуй, 40. Таже молитва:

Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагоутробне, Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи приими и наша в час сей молитвы, и исправи живот наш к заповедем Твоим: души наша освяти, тела очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаеми, и наставляеми, достигнем в соединение веры, и в разум неприступныя Твоя славы, яко благословен еси во веки веков, аминь.

Таже, Господи, помилуй, трижды.

Слава, и ныне: Честнейшую херувим:

Именем Господним благослови, отче:

Священник: Молитвами святых отец наших:

Таже молитва:

Боже и Господи сил, и всея твари Содетелю, Иже за милосердие безприкладныя милости Твоя, едиnorodнаго Сына Твоего Господа нашего

Иисуса Христа низпославый на спасение рода нашего: и честным Его Крестом рукописание грех наших растерзавый, и победивый тем начала и власти тьмы: Сам Владыко человеколюбче, прими и нас грешных благодарственныя сия и молебныя молитвы, и избави нас от всякаго всегубительнаго и мрачнаго прегрешения, и всех озлобити нас ищущих, видимых и невидимых враг. Пригвозди страху Твоему плоти наша, и не уклони сердец наших в словеса или помышления лукавствия: но любовь Твоею уязви души наша, да к Тебе всегда взирающе, и еже от Тебе светом наставляеми, Тебе неприступнаго и присносущнаго зряще света, непрестанное Тебе исповедание и благодарение возсылаем, безначальному Отцу со едиnorodным Твоим Сыном, и Всесвятым, и Благим, и Животворящим Твоим Духом, ныне и присно, и во веки веков, аминь.

ЧАС ДЕВЯТЫЙ.

Приидите поклонимся, трижды.

Псалом 92:

Господь воцарися, в лепоту облечеса: облечеса Господь в силу и препоясая, ибо утверди вселенную, яже не подвижится. Готов престол Твой оттоле, от века Ты еси. Воздвигоша реки, Господи, воздвигоша реки гласы своя: Возмут реки сотрения своя, от гласов вод многих. Дивны высоты морския: дивен в высоких Господь. Свидения Твоя уверишася зело: дому Твоему подобает святыня, Господи, в долготу дний.

Псалом 113.

Во исходе Израилеве от Египта, дому Иаковля из людей варвар, Бысть Иудеа святыня Его, Израиль область Его. Море виде и побеже, Иордан возвратися вспять. Горы възыграшася яко овни, и холми яко агнцы овчии. Что ти есть, море, яко побегло еси? и тебе, Иордане, яко возвратился еси вспять? Горы яко възыграстеся яко овни, и холми яко агнцы овчии? От лица Господня подвижеся земля, от лица Бога Иаковля: обращаго камень во езера водная, и несекомый во источники водныя. Не нам, Господи, не нам, но имени Твоему даждь славу о милости Твоей и истине Твоей. Да не когда рекут языцы: где есть Бог их? Бог же наш на небеси и на земли, вся елика восхоте сотвори. Идоли язык, серебро и золото, дела рук человеческих: Уста имут, и не възглаголют: очи имут, и не узрят: Уши имут, и не услышат: ноздри имут, и не обоняют, Руце имут, и не осяжут: нозе имут, и не пойдут: не възгласят гортанем своим. Подобни им да будут творящии я, и вси надеющиися на ня. Дом Израилев упова на Господа, помощник и защититель им есть. Дом Ааронь упова на Господа, помощник и защититель им есть. Боящиися Господа уповаша на Господа: помощник и защититель им есть. Господь помянув ны, благословил есть нас, благословил есть дом Израилев, благословил есть дом Ааронь, благословил есть боящиися Господа, малыя с великими. Да приложит Господь на вы, на вы, и на сыны ваша. Благословени вы Господеви, сотворшему небо и землю. Небо небесе Господеви, землю же даде сыновом человеческим. Не мертвии восхвалят Тя, Господи, ниже вси низходящии во ад: Но мы живии благословим Господа, от ныне и до века.

Псалом 85.

Приклони, Господи, ухо Твое, и услыши мя, яко нищ и убог есмь аз. Сохрани душу мою, яко преподобен есмь: спаси раба Твоего, Боже мой, уповающаго на Тя. Помилуй мя, Господи, яко к Тебе воззову весь день. Возвесели душу раба Твоего, яко к Тебе взях душу мою. Яко Ты, Господи, благ и кроток, и многомилостив всем призывающим Тя. Внуши, Господи, молитву мою, и вонми гласу моления моего. В день скорби моя воззвах к Тебе, яко услышал мя еси. Нещь подобен Тебе в бозех, Господи, и несть по делом Твоим. Все языцы, елики сотворил еси, приидут, и поклонятся пред Тобою, Господи, и прославят имя Твое: яко велий еси Ты, и творяй чудеса, Ты еси Бог един. Настави мя, Господи, на путь Твой, и пойду во истине Твоей: да возвеселится сердце мое боятися имене Твоего. Исповемся Тебе, Господи Боже мой, всем сердцем моим, и прославлю имя Твое в

век. Яко милость Твоя велия на мне, и избавил еси душу мою от ада преисподнейшаго. Боже, законопреступницы восташа на мя, и сонм державных взыскаша душу мою, и не предложиша Тебе пред собою. И Ты, Господи Боже мой, щедрый и милостивый, долготерпеливый и многомилостивый и истинный. Призри на мя и помилуй мя, даждь державу Твою отроку Твоему, и спаси сына рабы Твоея. Сотвори со мною знамение во благо, и да видят ненавидящие мя, и постыдятся: яко Ты, Господи, помог ми и утешил мя еси.

Слава, и ныне, Аллилуиа, трижды. Господи, помилуй, трижды.

Слава, тропарь, глас 4:

Возвращашеся иногда Иордан / река милотию Елиссеевою, вознесшуся Илии, / и разделяхуся воды сюду и сюду, / и бысть ему сух путь, иже мокрый, / во образ воистинну крещения, / имже мы текущее жития преходим шествие: / Христос явися во Иордане освятити воды.

И ныне, Богородичен:

Иже нас ради рождейся от Девы, и распятие претерпев, Благий, испровергий смертию смерть, и воскресение явлей яко Бог, не презри яже создал еси рукою Твоею, яви человеколюбие Твое, Милостиве, прими рождшую Тя Богородицу молящуюся за ны, и спаси, Спасе наш, люди отчаянныя.

Таже, тропарь глас 7:

Ужас бе видети, небесе и земли Творца на реце обнажшагося, и крещение от раба за наше спасение приемлющаго, яко раба, и лица ангельстии дивляхуся, страхом и радостию. С нимиже покланяемся Тебе, спаси нас Господи. [Дважды.]

Таже, глас 2.

Стих: Сего ради помянух Тя * от земли Иордански и Ермониимски.

Егда к себе грядуща Предтеча Господа славы, / вопияше, зря: / Сей избавляяй мира прииде, от истления: / Сей избавляет нас от скорби: / Сей согрешений оставление дарует яко Бог на земли, / от Девы Чистыя прииде милости ради, / и вместо рабов, сыны Божия соделовае: / вместо же тьмы, просвещает человечество водою Божественнаго Крещения Его. / Прочее приидите, / согласно Того да славословим, со Отцем и со Святым Духом.

Стих: Видеша Тя воды, Боже, * видеша Тя воды, и убояшася.

И наки, тойже тропарь.

Егда к себе грядуща Предтеча Господа славы, / вопияше, зря: / Сей избавляяй мира прииде, от истления: / Сей избавляет нас от скорби: / Сей согрешений оставление дарует яко Бог на земли, / от Девы Чистыя прииде милости ради, / и вместо рабов, сыны Божия соделовае: / вместо же тьмы, просвещает человечество водою Божественнаго Крещения Его. / Прочее приидите, / согласно Того да славословим, со Отцем и со Святым Духом.

Таже канонарх, став среди церкви, поет стихиру сию: Глас 5:

Руку твою прикоснувшуюся пречистому верху Владычню, / с неюже и перстом Того нам показал еси, / воздежи о нас к Нему, Крестителю, / яко дерзновение имея много: / ибо болий пророк всех от Него свидетельствован еси. / Очи же твои паки Всесвятаго Духа видевшия, / яко в виде голубине сошедша, / воздвигни к Нему Крестителю, / и милостива нам содей: / и прииди, стани с нами, / запечатая пение, / и предначинай торжество.

И творим три поклоны.

(Потом, аще подабает, диакон чет многолетие.)

Таже клир поют стихиру:

Слава, и ныне, глас 5:

Руку твою прикоснувшуюся пречистому верху Владычню, / с неюже и перстом Того нам показал еси, / воздежи о нас к Нему, Крестителю, / яко дерзновение имея много: / ибо болий пророк всех от Него свидетельствован еси. / Очи же твои паки Всесвятаго Духа видевшия, / яко в виде голубине сошедша, / воздвигни к Нему Крестителю, / и милостива нам содей: / и прииди, стани с нами, / запечатая пение, / и предначинай торжество.

На 9-м часе кадит диакон весь храм.

Таже прокимен, глас 3:

Прокимен: Господь просвещение мое, * и Спаситель мой, кого убоюся?

Стих: Господь защититель живота моего, от кого утрашуся?

Посем паремия:

Пророчества Исаиина чтение: [Глава 49.]

Тако глаголет Господь: во время приятное послушах тя, и в день спасения помогах тебе, и создах тя, и дах тя в завет языков, еже устроить землю, и наследити наследие пустыни, глаголюща сущим во узах: изыдите: и сущим во тьме, открыйтеся. На всех путех пастися будут, и на всех стезях пажить их. Не взалчут, ниже вжаждут, ниже поразит их зной, ниже солнце: но милуй их утешит я, и сквозе источники вод проведет я. И положу всякую гору в путь, и всякую стезю в паству их. Се сии издалеча приидут, сии от севера и моря, инии же от земли Персская. Да веселятся небеса, и радуется земля: да отрыгнут горы веселие, и холми правду, яко помилова Бог люди Своя, и смиренныя людей утешит. Рече же Сион: остави мя Господь, и Бог забы мя. Еда забудет жена отроча свое? или не помилует изчадия чрева своего? Аще ли же и сих забудет жена, но аз не забуду тебе, глаголет Господь.

К Титу послания святаго апостола Павла чтение. [зачало 302.]

Чадо Тите, явися благодать Божия спасительная всем человеком. Наказующи нас, да отвергшеся нечестия и мирских похотей, целомудренно, и праведно, и благочестно поживем в нынешнем веце, Ждуще блаженнаго упования, и явления славы великаго Бога и Спаса нашего Иисуса Христа: Иже дал есть Себе за ны, да избавит ны от всякаго беззакония, и очистит Себе люди избранны, ревнители

добрым делом. Егда же благодать и человеколюбие явися Спаса нашего Бога: Не от дел праведных, ихже сотворихом мы, но по Своей Его милости, спасе нас банею пакибытия, и обновлением Духа Святаго, Егоже излиа на нас обильно Иисус Христом, Спасителем нашим: Да оправдившися благодатию Его наследницы будем по упованию жизни вечныя.

Диакон: Премудрость, прости услышим святаго Евангелиа.

Иерей: От Матфеа святаго Евангелиа чтение. [Зачало 6.]

Во время оно, прииде Иисус от Галилеи на: Иордан ко Иоанну, креститися от него. Иоанн же возбраняше Ему, глаголя: аз требую Тобою креститися, и Ты ли грядеши ко мне? Отвещав же Иисус рече к нему: остави ныне, тако бо подобно есть нам исполнити всяку правду. Тогда остави Его. И крестився Иисус взыде абие от воды: и се отверзошася Ему небеса, и виде Духа Божия сходяща яко голубя, и грядуща на Него. И се глас с небесе глаголя: Сей есть Сын Мой возлюбленный, о Немже благоволих.

Таже, Не предаждь нас до конца, имене Твоего ради, и не разори завета Твоего, и не отстави милости Твоя от нас, Авраама ради возлюбленного от Тебе, и за Исаака раба Твоего, и Израиля святаго Твоего.

Таже Трисвятое, и по Отче наш.

Кондак предпразднства, глас 4:

Подобен: Явился еси днесь:

Во струях днесь Иорданских / быв Господь, Иоанну вопиет: / не убойся крестити Мя, / спасти бо приидох / Адама первозданнаго.

Господи, помилуй, 40. Таже молитва:

Иже на всякое время, и на всякий час, на Небеси и на земли, покланяемый и славимый, Христе Боже, долготерпеливе, многомилостиве, многоблагоутробне, Иже праведныя любяй, и грешныя милуяй, Иже вся зовый ко спасению, обещания ради будущих благ. Сам Господи прими и наша в час сей молитвы, и исправи живот наш к заповедем Твоим: души наша освяти, телеса очисти: помышления исправи, мысли очисти: и избави нас от всякия скорби, зол и болезней: огради нас святыми Твоими ангелы, да ополчением их соблюдаеми, и наставляеми, достигнем в соединение веры, и в разум неприступныя Твоя славы, яко благословен еси во веки веков, аминь.

Таже, Господи, помилуй, трижды.

Слава, и ныне: Честнейшую херувим:

Именем Господним благослови, отче:

Священник: Боже, ущедри ны, и благослови ны:

Таже, молитва:

Владыко Господи Иисусе Христе Боже наш, долготерпевый о наших согрешениях, и даже до нынешняго часа приведый нас, воньже на животворящем древе вися, благоразумному разбойнику иже в рай путесотворил еси вход, и

смертию смерть разрушил еси, очисти нас грешных и недостойных раб Твоих. Согрешихом бо и беззаконновахом, и несмы достойни возвести очеса наша и возрети на высоту Небесную, зане оставихом путь правды Твоея, и ходихом в волях сердец наших. Но молим Твою безмерную благость, пощади нас, Господи, по множеству милости Твоея, и спаси нас Имене Твоего ради Святаго, яко исчезоша в суете дние наша, изми нас из руки сопротивнаго, и остави нам грехи наша, и умертви плотское наше мудрование, да ветхаго отложивше человека, в новаго облечемся: и Тебе поживем, нашему Владыце и Благодетелю, и тако Твоим последующе повелением, в вечный покой достигнем, идеже есть всех веселящихся жилище, Ты бо еси воистинну истинное веселие и радость любящих Тя, Христе Боже наш, и Тебе славу возсылаем, со Безначальным Твоим Отцем, и Пресвятым и Благим и Животворящим Твоим Духом, ныне и присно и во веки веков. Аминь.

Слава, и ныне. Господи, помилуй, трижды, благослови.

И отпуст.

указано на ряду. Глаголем же и псалом 33, Благословлю Господа: И отпуст. И в той день ядим сыр и яйца.

Аще будет Навечерие в субботу: Прокимен, Аллилуиа и причастен дне: Апостол же и Евангелие прежде субботе пред Богоявлением, и потом ряд. По Изрядней поем Достойно:

Аще ли в неделю Навечерие Богоявления: Прокимен, Апостол, Аллилуиа, Евангелие и причастен, прежде Недели пред Богоявлением, и потом ряд. По Изрядней же поем Достойно: По отпущении же Литургии, ядим укрузи, и пием по единой чаши вина. Совершенно же ядим по отпущении Вечерни, со елеем: сыра же и яиц, и рыбы, никакоже дерзнем коснуться.

Аще ли в пяток, прежде Навечерий Богоявления, когда поются Часы Царския: зри указ декемвриа в 24 день.